

Կ Ա Թ Ո Ւ Ղ Ի Կ Ո Ս Ա Կ Ա Ն

ԸՆՏՐԵԼԻՆԵՐ

ՀԱՅԱՍՏԱՆԵԱՅՑ ԵԿԵՂԵՑԻՈՅ ՇԱՀԵՐԻ ՆԱԽԱՆ-
ՉԱԽՆԳԻՐ ԱՆՁԻՆՔՆԵՐԻ ԿՈՂՄԻՑ

Գ Ր Ե Ց

ԱՐՄԵՆԱԿ ՍԻՒՆԻ


(Բ. ԳՈՐԾ)

- «Թէ կախաղան ես բարձրացրած
«Անարդ մահով կը պատժուես,
«Գարձեալ ցմահուանս վերջին բոպէս
«Ազատօրէն կը խօսեմ...
«Թող անօրէնն իւր կրքերին
«Ձոնէ անձս անպաշտպան,
«Ի՛հ նշանաբանն է փնել
«Հեղ զինուոր մշմարտութեան»...

Թ Ի Ֆ Լ Ի Ս

ՏՊԱՐԱՆ Լ. Գ. ԿՐԱՄԱՐԵՆԿՈՅ.

1884




281.6

Ա

Կ Ա Ք Ո Ւ Ղ Ի Կ Ո Ս Ա Կ Ա Ն

ԸՆՏՐԵԼԻՆԵՐ




ՀԱՅԱՍՏԱՆԵԱՅՑ ԵԿԵՂԵՑԻՈՅ ՇԱՀԵՐԻ ՆԱԽԱՆ-
ՉԱԽՆԴԻՐ ԱՆՁԻՆՔՆԵՐԻ ԿՈՂՄԻՅ

Գ Ր Ե Ց

ԱՐՄԵՆԱԿ ՍԻՒՆԻ

(Բ. ԳՈՐԾ)


«Թէ կախազան ես բարձրացրած
 «Անարգ մահով կը պատժուեմ,
 «Դարձեալ ցմահուանս վերջին րոպէս
 «Ազատօրէն կը խօսեմ...
 «Թող անօրէնն իւր կրքերին
 «Ձոհէ անձս անպաշտպան,
 «Ի՛հ նշանաբանն է լինել
 «Հեզ զինուոր ճշմարտութեան»...



Թ Ի Ց Լ Ի Ս

ՏՊԱՐԱՆ Լ. Գ. ԿՐԱՄԱՐԵՆԿՈՅԻ.

A 758




ԿԱԹՈՒՂԻԿՈՍԱԿԱՆ ԸՆՏՐՈՒԹԵԱՆ

ՊԱՏԳԱՄԱԻՈՐՆԵՐԻՆ

ԽՈՐԻՆ

ՅԱՐԳԱՆՔՈՎ

ՆՈՒԷՐ



Ս Գ Լ Ե Գ

ՀԱՅԿԱՍՏԱՆԻ ԳՐԱԴԱՐԱՆ

1884

ՊԱՏԿԱՄԱԻՈՐՆԵՐԻՆ


Ձեզ յայտնի է, որ ներկայումս մեր Ազգը զբաղուած է կաթողիկոսական ընտրութեան հարցով. նոյնպէս քաջ յայտնի է, թէ այդ պաշտօնի գլուխ անցնողի արժանաւորութիւնը որպիսի մեծ նշանակութիւն ունի մեզ համար: Եւ որովհետեւ այս խնդրի բարեյաջող վճիռը կախուած է գլխաւորապէս Ձեզանից, ուստի Ձեր խորին ուշադրութիւնը հրաւիրելով ներկայ գրուածքիս վերայ, որը և ձգտում է այդ նպատակին, և յուսալով, որ Դուք, իբրև ազգի ներկայացուցիչներ արժանաւորապէս կը կատարէք Ձեր պարտականութիւնը և կ'արդարացնէք Ձեզ վրայ դրած մեր բոլորիս յոյսերը, ուստի ինչ քաղցր է թւում գրքոյկիս ճակատը պսակել Ձեր Վսեմափայլ Անունով...

Дозволено Цензурою 18 Января 1884 года

Тип. Л. Г. Крамаренко. Пом. на Мух. ул. д. № 13

Մե՛ ռք յերեխայից, մե՛ ռք ՚ի թերահաւատից, և մե՛
ռք յապաշխարողաց և յանմաքրից մերձեսցի յԱստուա-
ծային խորհուրդս:—Ողջոյն տո՛ւք միմեանց ՚ի համբոյց
սրբութեան. և որք ո՛չ էք կարողք հաղորդիլ Աստուա-
ծային խորհրդոյս՝ առ դրունս ելէք և աղօթեցէք...—
Երկիւղիւ և հաւատով յառաջ մատիք և սրբութեամբ
հաղորդեցարո՛ւք...

(պատար. արարող.)



Մօտենում է այն օրը, երբ Հայ ազգը պէտք
է վճռէ մի շատ նշանաւոր խնդիր. 1884 թ.
Մայիս ամսին հայերս պէտք է ընտրենք կա-
թողիկոս և բարձրացնենք Լուսաւորչեան Գահի-
էջմիածնի Աթոռի վերայ: Չը նայելով, որ մենք
շատ ժամանակ ունէինք այդ նշանաւոր խնդիրը
ուսումնասիրելու համար, բայց ընդհանրապէս
շատ քիչ բան շինեցինք: Այդպիսի դէպքերում
գլխաւոր պարտականութիւնը ընկնում է մամու-
լի կամ հրապարակախօսների վերայ, որոնք կա-
րող են և պարտաւոր են ընթերցող հասարակու-
թեան ծանօթացնել խնդրի մանրամասնութեան
հետ: Բայց փոխանակ լուրջ կերպով հարցը ու-

սումնասիրելու, ռուսա-հայոց և տաճկա-հայոց մամուլները փոխադարձապէս սկսեցին լմեղադրել միմեանց դէպի խնդիրը ունեցած պարտազանցութեան և կողմնապահութեան մէջ: Երկու կողմերի հրապարակախօսները վերաբերուեցին միմեանց նոյն ձևով: Գործի տաք ժամանակ այդպիսի վարմունքը և առանց խնդիրը մշակելու նրա վճռին մօտենալը մեծ յանցանք է գործողների կողմից:

Հայ ազգը իւր բազմամեայ փորձերից պէտք է համոզուած լինի, որ առանց ծանր և խելացի մտածութեան, առանց նախատեսելու ծանր գործին ձեռնարկելը, շատ վատ հետևանքներ է ունենում: Փորձառութեան այդ դառն բաժակները հայերս ընդունել ենք շատ անգամ բայց կարծես թէ դեռ ևս չենք կամենում խրատուել անցեալի դասերից, կարծես թէ չենք կամենում ուղղել մեր նախընթաց սխալները: Դառնութեան բաժակի ծանրութիւնը մեզ զգալի է միայն նոր, աաք ժամանակ, բայց երբ նորը հնացաւ, տաքը սառեց, կարծես թէ մենք էլ մոռանում ենք նորից զգացած դառնութիւնը և ապագայում էլի շարունակում ենք մեր նախընթաց սխալ ուղղութիւնը: Հայերս շնորհիւ երկպառակութեան և տարբեր կուսակցութիւնների բաժանման ընդունակ ենք մեծ սխալներ գործելու և այդ մեծ սխալները մենք արել ենք

շատ անգամ: Ահա այժմ մի մեծ խնդիրն էլ գրուած է մեր առաջ. մենք պէտք է ընտրենք կաթուղիկոս. կ՛ուղղենք արդեօք մեր նախնիքաց սխալները այդ մեծ խնդրի վերաբերութեամբ, թէ՛ կը շարունակենք մի և նոյն սխալ ուղղութիւնը, — այդ ցոյց կը տայ մօտաւոր ապագան:

Էջմիածնի կաթուղիկոսը մէկ մասնաւոր վիճակի պաշտօնեայ կամ հայ ժողովրդի միայն մի մասի առաջնորդ չէ, որ նրա ընտրութեան գործին նայէինք կողմնակի կերպով, այլ նա համարվում է ընդհանուր հոգւոր առաջնորդ և հովիւ բոլոր այն լուսաւորչական հայերի, որոնք գտնվում են Ռուսաստանի, Տաճկաստանի, Պարսկաստանի, Հնդկաստանի և Ռումինիայի իշխանութիւնների ներքոյ, այլ և երկրագնդի բոլոր տեղերում: Նրա բարոյական ազդեցութիւնը և գերիշխանութիւնը տարածվում է և Տաճկաստանում երկու պատրիարքների (Կ. Պօլսի և Երուսաղէմի) և երկու կաթուղիկոսների (Սիսի և Աղթամարի) վերայ: Պարսկաստանի և Հնդկաստանի թեմական առաջնորդները նոյնպէս ստորադրուած են նրա իրաւասութեան: Էջմիածնի կաթուղիկոսը միակ պաշտօնեայ է Հայ ազգի մէջ, որը իրաւունք ունի եկեղեցական ծանրակշիռ հարցեր վճռելու: Այժմ տեսնենք, թէ Քնչպիսի արժանաւորութիւնների տէր մարդ է հարկաւոր այս մեծ պաշտօնի համար:

Մեր անցեալում և շատ մօտիկ անցեալում
ունեցել ենք այնպիսի դէպքեր, որ կաթուղիկո-
սի ընտրութիւնը կատարուել է անգիտակցա-
բար կերպով: Ընտրելին չէ գիտացել, թէ թիւնչի
համար է ընտրվում և թիւնչ պարտաւորութիւններ
է դրած իր վրայ, իսկ ընտրողներն էլ նոյնպէս
չեն գիտացել, թէ թիւնչի համար են ընտրում և
թիւնչ պէտք է պահանջեն նորանից: Գործը կատա-
րուել է միայն ձևական կերպով, որովհետև յայ-
տնի է եղել, որ այդպիսի ընտրութիւնը կատա-
րուել է և անցեալում, բայց թէ թիւնչի համար
դրա մասին շատ էլ չեն հետաքրքրուել, այլ ամեն
բան կատարել են աւանդութիւնների հիման
վրայ: Հասկանալի է, որ այդպիսի դրութեամբ
ընտրած կաթուղիկոսը արժանաւոր մարդ չէր կա-
րող լինել և հետեւապէս իւր պաշտօնն էլ անկա-
րող կը լինէր օրինաւոր կառավարել: Բայց այդ
ժամանակը անցաւ անգառնալի: Չը նայելով, որ
այդպիսի դէպքերից մի քանիսի կատարուած ժա-
մանակից անցել են տասն և հինգ կամ քսան
տարիներ, բայց համեմատաբար այդ կարճ միջո-
ցում շատ բան է փոխուել: Երևակայական ան-
ցեալից մենք փոխուել ենք գիտակցական ներկա-
յի մէջ: Եթէ մօտիկ անցեալում մենք գործել
ենք անգիտակցաբար, դա այլ ես անկարելի է
ներկայումս: Բայց դառնանք կաթուղիկոսացուի

արժանաւորութեան և տեսնենք նոյնպէս թէ ինչ պաշտօններ ունի նա կառավարելու մեր մէջ:

Շատերը այնքան համեստ են, որ բաւականանում են այսքանով, թէ կաթուղիկոսացուն փոքր ինչ ծանօթ լինի իւր ազգային—եկեղեցական պատմութեան, փոքր ինչ էլ սէր ունենայ դէպի նրանց և հաւատարիմ լինի իւր պաշտօնի մէջ: Սրանք այնպիսի արժանաւորութիւններ են, որոնց պէտք է պահանջել և գիւղական յետին ժամկոչից, բայց կաթուղիկոսացուի համար այսքանը բաւական չէ:

Մեր եկեղեցական բոլոր հիմնարկութիւնները, մեր ամբողջ հոգևորականութիւնը, մեր թէ ներքին և թէ արտաքին բոլոր հոգևորական գործերը գտնվում են կաթուղիկոսի կառավարութեան ներքոյ, և որպէս զի այդ բոլոր գործերը իւրեանց կարգի և կանոնի մէջ գրուած լինեն և մեր ժամանակակից պահանջներին համապատասխանեն, - կաթուղիկոսը պէտք է ունենայ կառավարչական ընդունակութիւն: Մեր եկեղեցին իր ներքին և արտաքին կազմակերպութեամբ գտնվում է նոյնպէս կաթուղիկոսի կառավարութեան ներքոյ, և որպէս զի եկեղեցին և ժողովուրդը փոխադարձապէս հասկանան միմեանց կարիքները և սիրեն միմեանց, — կաթուղիկոսը պէտք է լաւ տեղեակ լինի եկեղեցական կարգերին և պատմու-

թեան, և որ ամենագլխաւորն է պէտք է ծանօթ լինի Աստուածաբանութեան: Մեր բոլոր կրթական գործերը, մեր բոլոր ուսումնարանները գտնվում են կաթողիկոսի կառավարութեան ներքոյ, և որպէս զի այդ հիմնարկութիւնները հետեւէն առաջագէմ սկզբունքներին և համապատասխանեն ժողովրդի ժամանակակից պահանջներին, — կաթողիկոսը պէտք է ծանօթ լինի մանկավարժութեան: Մեր ազգային — եկեղեցական կալուածները, մեր նիւթական բոլոր աղբիւրները գտնվում են կաթողիկոսի կառավարութեան ներքոյ, և որպէս զի մեր այդ աղբիւրները կանոնաւորուեն և մեր աղքատ գումարները խնայողաբար և նպատակալարմար կերպով գործածուեն, — կաթողիկոսը պէտք է ծանօթ լինի տնտեսագիտութեան: Որովհետև կաթողիկոսը իւր ցրուած ժողովրդի վերայ քաղաքականապէս իշխող պետութիւնների հետ իր պաշտօնին վերաբերեալ գործերի մասին յարաբերութիւն ունեցող մարդն է, և որպէս զի այդ մարդը կարողանայ իր ժողովրդի և նրա վրայ իշխող մի որ և է պետութեան շահերը միմեանց հետ համաձայնութեան մէջ պահել և նրանց մէջ փոխադարձական սէր և համերաշխութիւն պահպանել, — կաթողիկոսը պէտք է ծանօթ լինի քաղաքագիտութեան: Կաթողիկոսը որպէս սուրբ գրքերի հետ գործ ունեցող մարդ, լաւ է եթէ

գիտենայ կլասիքական լեզուներից—յունարէնը, լատիններէնը և եբրայեցերէնը: Իսկ որպէս էջմիածնին տիրող պետութեան պաշտօնական լեզուն, պէտք է լաւ գետենայ ռուսերէնը. պէտք է գիտենայ և եւրօպական լեզուներից գոնէ մէկը, աւելի հարկաւոր է ֆրանսիէրէնը: Նա պէտք է ունենայ և գրականական արժանաւորութիւն. պէտք է իւր աշխատութիւններով յայտնի լինի գրականութեան մէջ: Բացի այս բոլորից կաթողիկոսը պէտք է լինի յայտնի և համակրութիւն վայելող անձնաւորութիւն, որպէս զի կարողանայ իւր բարոյական ազդեցութեամբ, իւր ցրուած ժողովրդի մէջ սլահայանել բարոյական կապ և ազգային համերաշխութիւն: Կաթողիկոսը պէտք է ուսումնասիրած լինի և գոնէ ուսումնասիրելու կարողութիւն ունենայ և այն ազգերի կեանքի պայմանները, որոնց մէջ ապրում է իւր ժողովուրդը և որոնց շահերի հետ շփվում են իւր ժողովրդի շահերը: Կաթողիկոսը պէտք է լինի ժողովրդական մարդ: Նա պէտք է խորասուզուող լինի իւր ժողովրդի պիտոյքների ովկիանոսի մէջ, նրա ցաւերը հասկանայ և դարմանէ... Նա պէտք է սրբէ հայրաբարոյ կարեկցութեամբ իւր ժողովրդի արտասուքները... Նա պէտք է լսէ նիւթապէս անապահով պաշտօնեաների, ուսումնածարաւ մանուկների, Աստուա-

Ծային կենդանի խօսք խնդրող ժողովրդի և դէպի իրան դիմող ամեն մի ալաչողի ձայները... Նա պէտք է հովանաւորէ և խնամէ իւր բազմակարիք և թշուառացեալ ժողովրդին... Ահա թէ որչափ ծանր է կաթուղիկոսի լուծը և որչափ մեծ են նրա պարտականութիւնները: Բայց քանի՞—քանի՞ անարժաններ և անպիտաններ լանդգնում են և անազնիւ միջոցներով աշխատում են մօտենալ այս սուրբ պաշտօնին... Սրբազան հայրեր! սուրբ և նուիրական է կաթուղիկոսական պաշտօնը, իսկ ծանր և դժուար է նրա լուծը... Թող Ձեզանից իւրաքանչիւրը լրջմտութեամբ կշռէ իւր ոյժը և արժանաւորութիւնը. պատասխանատուութիւնը մեծ է... Երևակայական անցեալից փոխուել ենք գիտակցութեան ներկայի մէջ... Ով որ կը լանդգնի անարժանաւորապէս բարձրանալ մեծ Գրիգորի Գահի վրայ, նա, հասարակական կարծիքի անողոք դատավճռի համաձայն, ամենախայտառակ կերպով կը ծաղրուի աշխարհի առաջ... Իսկ նրա անունը և յիշատակը կը դատապարտուեն յաւիտենական նզովքների... «Զօգուտն ձեր դուք գիտէք»:

Գուցէ շատերը իմ ասածները չափազանցութիւն համարեն և պատասխանեն, որ իմ պահանջների համաձայն մարդ չկայ ներկայումս մեր հոգևորականութեան մէջ: Այո, գուցէ կատարե-

ապէս համապատասխանող չկայ, բայց գոնէ աշտօնէնք եղածներից ընտրել ամենաարժանաւորին: Եւ ես կասեմ, որ վերայիշեալ պահանջներին ընդհանրապէս համապատասխանող մարդիք, կան մեր հոգեւորականութեան մէջ, բայց թէ ինչու մինչև այսօրս լաւ յայտնի չեն նրանք մեր ընդհանուր հասարակութեան, դորա պատճառը պէտք է որոնել նրանց համեստութեան մէջ, որոնք չեն կամեցել շատերի նման վարձկան հրապարակախօսների միջոցով հռչակել իրանց անունները, իսկ հրապարակախօսները չեն կամեցել անվարձ կերպով կատարել իրանց պարտականութիւնը և ներկայացնել հասարակութեան նրանց արժանաւորութիւնների ճիշտ նկարագիրը:

Հայ ժողովուրդը ընտրում է կաթուղիկոս, բայց մինչև այսօր նա չը գիտէ, թէ այդ պաշտօնի համար ինչ արժանաւոր մարդիք կան իր մէջ և ո՞վքեր են: Այդպիսի գէպքերում պարտականութիւնը ընկնում է ժողովրդի կարծիքի առաջնորդ համարուած—հրապարակախօսի վերայ, որը պէտք է աշխատէ ազգի մէջ եղած արժանաւոր մարդիքների մասին հաւաքել տեղեկութիւններ և առանց աղաւաղելու առաջարկել հասարակութեան ծանօթանալու: Այս մեծ գործի ժամանակ հրապարակախօսը պէտք է մոռանայ ամեն անձնական համակրութիւն կամ հակակրութիւն և

անաչառութեամբ հասարակութեան պէտք է ներկայացնի իր թշնամի կամ բարեկամ արժանաւորներին իրանց իսկական պատկերներով: Հրապարակախօսը պէտք է բթացնէ իւր բոլոր զգայարանքները, որոնք կարող էին զգալ թշնամական կամ բարեկամական ազդեցութիւն: Նա պէտք է մոռանայ այն ամենը, ինչ որ անձնական է և պէտք է խօսէ այն, ինչ որ իսկապէս կայ: Նա պէտք է նուիրուի այն բանին, ինչ որ լաւ և հասարակական է: Բայց ցաւալին սա է, որ ինչ որ ես այստեղ ասեցի հրապարակախօսի վերաբերութեամբ, այս բոլորը աւելի ընդարձակ կերպով և բանաստեղծական նկարագրութեամբ ասել է և ասում է ամեն մի հրապարակախօս, իսկ բանից դուրս է գալիս, որ այն բանը, ինչ որ ինքը քարոզում է ուրիշներին, իրան մէջ գործադրութիւն չէ գրտնում. նա դաւաճանում է, իր քարոզած գաղափարներին և իր ասածների հակառակ է գործում...—Տեսնում էք մի հրապարակախօս, որը իւր հեղինակութիւնների մէջ շարունակ քարոզում է ազնուութիւն, անկողմնապահութիւն և ճշմարտասիրութիւն, իր պաշտօնակիցներին մեղադրում է անազնիւ շահախնդրութեան և կողմնապահութեան մէջ, իր բանաստեղծական տաղանդով, իր մի քանի հետաքրքիր գրուածքներով գրաւել է ընթերցող հասարակութեան մի


մասի համակրութիւնը, որը նրա աշխատութիւնը վարձատրելու նպատակով պատրաստվում է տօնել նրա գրականական գործունէութեան քսան և հինգ ամեայ յօբէլեանը: Այդ միջոցին զարթնում է կաթողիկոսական խնդիր, ամեն մէկը այդ խնդրի վերաբերութեամբ յայտնում է իւր կարծիքները, պաշտպանում է մի որ և է անձի ընտրելիութիւնը: Հրապարակ է դուրս գալիս և մեր իշաճ հրապարակախօսը, սկսում է գրել մի շարք յօդուածներ: Հասարակութիւնը մեծ յօյսեր ունի դրա վրայ, անհամբերութեամբ կարդում է նրա յօդուածները, ցանկանալով իմանալ նրա անաչառ կարծիքները: Մեր հրապարակախօսը օգուտ է քաշում դէպքից. նա յենուած իւր հեղինակութեան վերայ և ժողովրդեան կողմից ցոյց տրուելի համակրութիւնից հպարտացած, կարծում է, որ իւր ամեն մի խօսքը հալած իւղի տեղ կ'ընդունուի: Նա սկսում է արտայայտել իւր մտքերը և ինչ էք տեսնում, այդ մարդը, որ այնքան մեծ ոգևորութեամբ քարոզում էր ազնուութիւն, անկողմնապահութիւն և յարձակվում էր իր հակառակորդների վրայ, մեղադրելով նրանց շահախնդրութեան, անազնուութեան և իրանց անարժան կանգի դատներին պաշտպանելու մէջ, — ահա նոյն իսկ այդ մարդը սկսում է նոյնը անել աւելի անազնիւ կերպով. նա յայտնապէս, առանց կարմ-

ըլու ստորացնում և պախարակում է արդէն յայտնի արժանաւորներին, իսկ բարձրացնում և պաշտպանում է անարժաններին և անպիտաններին... Բայց ես դառնամ կաթուղիկոսական ընտրելիներին:

Որքան ես լիշում եմ, Կ. Պօլսի Հայոց Ազգային ժողովը, կաթուղիկոսական պաշտօնի համարի նկատի էր առած եօթը ընտրելիներ: Ես կաշխատեմ համառօտապէս խօսել այդ եօթը անձնաւորութիւնների մասին և ընթերցող հասարակութեան ծանօթացնել դրանց հետ, որքան իմ ձեռք բերած տեղեկութիւնները ինձ կը ներեն:

ՆԵՐՍԷՍ ԱՐՔԵՊԻՍԿՈՊՈՍ ՎԱՐԺԱՊԵՏԵԱՆ,
Կ. Պօլսի այժմեան պատրիարքը յայտնի է ամենքին: Նա իր ուսման ընթացքը աւարտել է Կ. Պօլսի Խաս-գիւղ թաղում գտնուող Ներսիսեան դպրոցում և այնուհետև վարել է զանազան պաշտօններ հոգևոր—ազգային ասպարիզում, իսկ հանգուցեալ Գէորգ Գ—ի ընտրութեան ժամանակ 1866 թ. տաճկա-հայերի կողմից Եջմիածին գնացած պատգամաւորներից մէկն էր: 1874 թ. նա ընտրուեցաւ Կ. Պօլսի պատրիարք, բայց մինչև վերջին ռուս-տաճկական պատերազմը, այսինքն մինչև Տաճկա-Հայաստանի խնդրի զարթնելը նա ընդհանրութեան յայտնի չէր: Երբ Բերլինում ստորագրուած դաշնագրի 61-ր յօդուածը նուիրուե-

ցաւ Տաճկա-Հայաստանի բարենորոգումներին, այդ օրից սկսուեցաւ Ներսէսի քաղաքագիտական գործունէութիւնը եւրօպական դիպլոմատների հետ այս խնդրի ասպարիզում: Ներսէսը իւր պատրիարքութեան ժամանակամիջոցում, այդ խնդրի քաղաքական ասպարիզում ցոյց տուեց շատ փայլուն կէտեր, որոնք թէ և իսկապէս ոչինչ չօգնեցին այդ խնդրի իրագործման, բայց քաղաքական շատ յաջող հանգամանքներ և այլ դէպքերը նպաստեցին Ներսէսի անունը ընդհանրացնելու և նրան տաճկա-հայերի խնդրի դիւցազն հռչակելու: Նա այժմ 45 տարեկան է: Լեզուներից բացի լաւ հայկաբանութեան, թէ գրաբառի և թէ աշխարհաբառի մէջ, գիտէ ֆրանսիերէնը և տաճկերէնը: Նրա գլխաւոր արժանաւորութիւնը, որով և հռչակուեց նրա անունը, քաղաքագիտական ընդունակութիւնն է: Կաթուղիկոսական ընտրելիութեան մասին խօսելով, Ներսէսը իւր քաղաքագիտական ընդունակութիւնով գուցէ աւելի շատ գործ կարող է կատարել պատրիարքական պաշտօնով Կ. Պօլսի մէջ, քան թէ կաթուղիկոսական պաշտօնով Եջմիածնի մէջ: Այլ խօսքով, Ներսէսը աւելի ընդունակ է քաղաքագիտութեան, այսպէս ասած արտաքին գործերի կառավարութեան մէջ, քան թէ կաթուղիկոսութեան, ներքին, եկեղեցական գործերի կառավարութեան մէջ:



ՄԿՐՏԻՉ ԱՐՔ.ԵՊԻՍԿՈՊՈՍ ԽՐԻՄԵԱՆԸ նոյնպէս յայտնի է ամենքին: Նա իւր սկզբնական ուսումը ստացել է Վանայ ծովակի վանքերում, իսկ Կ. Պօլսում նա ընդունել է իւր զարգացումը: Նա ճանապարհորդել է Կովկասը—Արարարատեան նահանգը, Պարսկաստանը և Պալեստինը—Երուսաղէմը: Գրականութեան մէջ յայտնի է նա «Հրաւիրակ, Արարատեան», «Հրաւիրակ երկրին Աւետեաց», «Մարգարիտ արքայութեան երկնից», «Հայրենիք», «Վանագոյժ» և այլ հեղինակութիւններով: Նա յայտնի է և որպէս խմբագիր «Արծիւ Վասպուրականի» ամսագրով, որոնց բոլորն էլ արտայայտում են մինչև ֆանատիկոսութեան հասած ազգասիրութիւն: Խրիմեանը վարել է և ուսուցչական և առաջնորդական պաշտօններ, թէ Կ. Պօլսում և թէ Հայաստանում, իսկ Վարազայ վանքում նա հիմնել է «Ժառանգաւորաց» դպրոց: 1869 թ. Խրիմեանը ընտրուեցաւ Կ. Պօլսի պատրիարք, բայց որովհետև կառավարչական ընդունակութիւնից և գործառնական հեռատեսութիւնից զուրկ էր, այդ պատճառով նրա ձեռնարկած գործերի մեծ մասը մնացին թերի և նպատակին չը հասան և նա չորս տարի անշարժ պատրիարքութիւն անելուց յետոյ, Ազգային ժողովի և իր մէջ տեղի ունեցած խռովութիւնների պատճառով, հրաժարուեցաւ պաշտօնից: Խրիմեանի անունը հռչակելուն նպաստե-

ցին նոյնպէս ո՛չ այնքան նրա գործունէութիւնը, որքան յաջող հանգամանքները: Նա այժմ մօտ 70 տարեկան է: Լեզուներից բացի լաւ հայերէնը չը գիտէ ո՛չ մի լեզու: Նրա գլխաւոր արժանաւորութիւնը, որով և հռչակուեցաւ նա, թսւնդ ազգասիրութիւնն է և բանաստեղծական տաղանդը: Կաթուղիկոսական ընտրելիութեան մասին խօսելով, Խրիմեանը իւր ազգասիրութիւնով և ազդու քարոզներով աւելի մեծ գործ կարող է կատարել իր հայրենի Հայաստանսւմ, իրան լաւ ծանօթ ժողովուրդի մէջ, քան թէ կաթուղիկոսական պաշտօնով, կառավարչութեան անընդունակ լինելով:

ՄԵԼՔԻՍԵՒԵԿ ԱՐՔԵՊԻՍԿՈՊՈՍ ՄՈՒՐԱԳԵԱՆ,
Զմիւռնիայի այժմեան առաջնորդը Թովուզ (Գանձակի նահանգում) գիւղացի և քահանայի որդի է: Նա իր ուսման ընթացքը աւարտել է Թիֆլիսի Ներսիսեան դպրոցում: Երջանկայիշատակ Ներսէս Ե-ը Թիֆլիս եղած ժամանակ շատ սիրում էր աշակերտ Մուրադեանին, որը կաթուղիկոսի կարգադրութեամբ իր գեղեցիկ շարադրած քարոզները կարդում էր Թիֆլիզի եկեղեցիների բեմից: Մուրադեանը իր ուսման ընթացքը աւարտելով, նոյն դպրոցում նշանակուեցաւ նախ աւագ վերակացուի և ապա տեսչի պաշտօնակատարի և Հայոց լեզուի և գրականութեան ուսուցչի պաշտօններում: Նա վարում էր նոյնպէս ուսուցչի

պաշտօն Թիֆլիսի հարուստ ընտանիքներում։ Այնուհետև նա հրաւիրուեցաւ Շուշի, այնտեղի ուսումնարանի տեսչի և ուսուցչի պաշտօններով, ուր մի քանի տարի մնալով և ուսումնարանը բարեկարգելով, Մուրադեանը թողեց Շուշի և գնաց Կ. Պօլիս, որտեղ մի քանի ժամանակ մնալուց յետոյ Երուսաղէմի պատրիարքից հրաւիրուեցաւ ժառանգաւորաց դպրոցում, ուսուցչի պաշտօնով։ Պատրիարքը տեսնելով Մուրադեանի ընդունակութիւնը և նրա ապագան նախատեսելով, նրան միջոց տուեց զարգանալու։ Այդ օգնութիւնից քաջալերուած Մուրադեանը ճանապարհորդեց Եւրօպայի մի քանի երկիրներ—Ֆրանսիա, Գերմանիա, Շվեյցարիա, Մուլդավիա և Ռումինիա։ Մուրադեանը իւր ընդունակութեան և ինքնակրթութեան շնորհիւ Շվեյցարիայի Յիւրիխ քաղաքի համալսարանում տուեց Աստուածաբանութիւնից քննութիւն և ամենայն յաջողութեամբ ստացաւ դոկտօրի աստիճան։ Այնուհետև Ազգային ժողովի և պատրիարքի միաձայն ցանկութեամբ ընտրուեցաւ Զմիւռնիայի առաջնորդ, որ տեղի խռովեալ և կուսակցական ժողովրդի մէջ միաբանութիւն և հաշտութիւն ձգելով, հիմնեց օրիօրգական առաջին ուսումնարանը։ Մուրադեանը դեռ Թիֆլիս եղած իւր պատանեկութեան ժամանակից յայտնի էր գրականութեան մէջ։ Նա աշխատակցում էր

պ. Մարկոս Աղտբէգեանի խմբագրած «Կռունկ
Հայոց աշխարհի» ամսագրին, Քարեգին (իւր նախ-
կինն անուն) Մուրադեան ստորագրութեամբ: Նա
յայտնի է և «Պատմութիւն Հայաստանեայց Առա-
քելական Ս. Եկեղեցւոյ» գրքի աշխատութիւնով,
որը մի գեղեցիկ և մինչև այժմ եղածներէից գե-
րազանց դասագիրք է մեր եկեղեցական պատմու-
թեան: Նա յայտնի է և «Եղծ բանաբաղութեան
Չամուռճեան պատուելւոյն», «Հայոց լեզուի քերա-
կանութիւնով» և ուրիշ հեղինակութիւններով: Մու-
րադեանը այժմ ՅՉ տարեկան է: Լեզուներից բա-
ցի լաւ հայկաբանութեան թէ գրաբառի և թէ
աշխարհաբառի մէջ, գիտէ ռուսերէնը, ֆրանսիէ-
րէնը, գերմաներէնը, իտալերէնը, արաբերէնը,
տաճկերէնը, լատիներէնը և յունարէնը, իսկ
առարկաներից լաւ ծանօթ է ֆիզիքայի, քիմի-
այի և մատեմատիքայի հետ: Բացառապէս սևուճ-
նասիրած է ազգային պատմութիւնը և գրականու-
թիւնը, նոյնպէս և եկեղեցական պատմութիւնը,
իսկ Աստուածաբանութիւնից, ինչպէս վերև տե-
սանք, դօկտորի աստիճան ունի: Մուրադեանը
իւր գործունէութեան մէջ ցոյց է տուած և կա-
ռավարչական շատ ընդունակութիւններ, որպէս
և Զմիւռնիայի պէս նշանաւոր թեմում: Նա, ինչ-
պէս արժանաւոր անձնաւորութիւն, յայտնի է թէ
ռուսա — հայերին, թէ տաճկա-հայերին և թէ ար-

տասահմանեան հայերին, առաւելապէս Եջմիածնի, Կ. Պօլսի և Երուսաղէմի հոգևոր դասերին: Կաթողիկոսական ընտրելիութեան մասին խօսելով, անկողմնապահ ընթերցողը այս տեղեկութիւններէց կ'եզրակացնի, որ այդ մեծ պաշտօնի համար, Մուրադեանը պարունակում է իր մէջ շատ արժանաւորութիւններ...

ԵՍՍՅԻ ԱՐՔ-ԵՊԻՍԿՈՊՈՍ ԿԱՐԱՊԵՏԵԱՆ,
Երուսաղէմի այժմեան պատրիարքը ծնուեցաւ 1821 թ., Կեսարիայի (փոքր Ասիայում) Թալաս գիւղում: Նա 13 տարեկան հասակում գնաց Կ. Պօլիս և այնտեղ վեց տարի շարունակ պտրապեցաւ հիւսնութեան արհեստով: Յետոյ գնաց Երուսաղէմ և չորս տարու չափ պարապեցաւ գրագիտական ուսումով և նոյն տեղ վարեց դպրոցի և տպարանի տեսչութեան պաշտօնները, որոնց ժամանակ և հաստատեց մի թանգարան, 2000-չափ գրքեր ցուցակագրելով: Սրբազանը ունենալով լուսանկարչական ձիրք և եռանդ, իւր այդ արհեստը կատարելագործելու նպատակով դիմեց նախ Կ. Պօլիս և յետոյ Փարիզ և Մանչեսթեր, որ և կատարեալ յաջողութիւն ստացաւ իր սիրած արհեստի մէջ: Այնտեղից դառնալով Երուսաղէմ, ընտրուեցաւ նոյն տեղի պատրիարք: Նա այժմ 63 տարեկան է: Լեզուներից բացի հայերէնը, գիտէ ֆրանսիերէնը, անգլիերէնը, արաբերէնը

և տաճկերէնը, իսկ առարկաներից Ֆիզիքա և քիմիա: Բացառապէս սրբազանը սիրահարուած է լուսանկարչական արհեստի վրայ. նա յայտնի է իբրև լաւ լուսանկար: Կաթուղիկոսական ընտրելիութեան մասին խօսելով, Եսային չէ ներկայացնում ինքն ըստ ինքեան մի մեծ արժանաւորութիւն այդ մեծ պաշտօնի համար: Նա գուցէ աւելի գործ կարող է կատարել իւր այժմեան պաշտօնով Երուսաղէմի պարտքերի վերաբերութեամբ:

ՅԱՐՈՒԹԻՒՆ (ԱՐԹԻՆ) ԱՐԳ-ԵՊԻՍԿՈՊՈՍ ՎԵՀԱՊԵՏԵԱՆ, նախկին առաջնորդ Կարնոյ, այժմեան փոխանորդ Երուսաղէմի պատրիարքի, ծնուեցաւ 1821 թ. Եգիպտոսի Ալէքսանդրիա քաղաքում, արաբ ծնողներից: Նա իւր սկզբնական ուսումը ստացաւ Երուսաղէմի վանքում և յետոյ գնաց Զմիւռնիա և մտաւ Մեսրոպեան վարժարանը, ուր երեք տարի մնալուց յետոյ գնաց Կ. Պօլիս և մտաւ Ամերիկացիների գիշերօթիկ վարժարանը: Այնտեղ երեք տարի մնալուց յետոյ, իւր բարերար Երուսաղէմի Կիրակոս պատրիարքի ձեռնտուութեամբ գնաց Ամերիկայ և երկու տարի մնալով փոփոխակի Նիւ-Եօրք և Բոստոն քաղաքներում, վերադարձաւ Կ. Պօլիս: Սրբազանը վարել է ուսուցչական պաշտօն Կ. Պօլսի Լանկայի Լուսաւորչեան վարժարանում, Երուսաղէմում և այլ տեղերում: Նա վարել է և պատրիարքական փոխանորդի պաշտօն

Կ. Պօլսոմ Մատթէոս և Գէորգ պատրիարքների ժամանակ և Երուսաղէմում այժմեան Եսայի պատրիարքի ժամանակ: Սրբազանը երկար ժամանակ վարել է և առաջնորդական պաշտօն Էրզրումում (Կարին) և Խարբերդի չորս միացեալ վիճակներում: Նա եղել է և քննիչ 1859 թ. Վանայ առաջնորդ Իգնատիոս վարդապետի և ժողովրդի մէջ եղած խռովութեան և 1865 թ. Այլթամարի Պետրոս կաթողիկոսի սպանութեան գործերի: Իսկ Յովհաննէս սրբազանին Երուսաղէմի պատրիարքական պաշտօնին հրաւիրելու, Յարութիւնը Կ. Պօլիս գնացած պատգամաւորներից մէկն էր: Սրբազանը իւր առաջնորդական տեղերում կանգնել է մի քանի շէնքեր և ուսումնարաններ, որոնցից նշանաւորն է Էրզրումի օրիորդական վարժարանը: Նա այժմ 63 տարեկան է: Լեզուներից բացի լաւ հայերէնը, գիտէ անգլիէրէնը, արաբերէնը և տաճկերէնը, իսկ առարկաներից Ֆիզիքա և քիմիա. այլ և նա յայտնի է իբրև հմուտ երկրաչափ: Կաթողիկոսական ընտրելիութեան մասին խօսելով, թէ և Յարութիւն սրբազանը ներկայացնում է մի քանի արժանաւորութիւններ, բայց և այդ բոլորը դեռ բաւական չեն կաթողիկոսական մեծ պաշտօնի համար:

ԲԱՐԹՈՒՂԻՄԷՆՈՍ ԵՊԻՍԿՈՊՈՍ, Բրուսսայի այժմեան առաջնորդը Հայ ազգին անմոռանալի Գէ-

որդ Գ-ի ձեռնասուն աշակերտ է: Այս անձի մասին ձեռք բերած ընդհանուր տեղեկութիւններին նայելով, սրբազանը չէ պարունակում իր մէջ այնպիսի մի որ և է արժանաւորութիւն, որով նա կարող լինէր կաթուղիկոսական ընտրելի համարուել: Գուցէ նա, մի մասնաւոր վիճակում կարող է առաջնորդական պաշտօն վարել, բայց կաթուղիկոսութիւն երբէք:

ՄՍԿԱՐ ԱՐԲ-ԵՊԻՍԿՈՊՈՍ, Էջմիածնի կաթուղիկոսական այժմեան տեղակալը ռուսահայոց հինաւուրց եպիսկոպոսներից մէկն է: Նրա կաթուղիկոսական քուէարկութիւնը այս անգամ երրորդը կը լինի. նա քուարկուել է և Մատթէոսի և Գէորգի հետ: Սրբազանը վարել է իր կեանքի մէջ զանազան պաշտօններ, թէ Էջմիածնում և թէ այլ տեղերում, ուր ի միջի այլոց ամբողջ տասն և հինգ տարի Թիֆլիզումն էր, թեմական առաջնորդի պաշտօնով, իսկ յետոյ նոյնպիսի պաշտօն նա վարեց Բեսսարաբիայի թեմում, Քիշինև քաղաքում: Սրբազանը իբրև հինաւուրց եպիսկոպոս, կատարել է շատ նշանաւոր պաշտօններ և յանձնարարութիւններ, Ներսէս և Մատթէոս կաթուղիկոսների ժամանակ, բայց այդ մասին դեռ ևս ոչինչ հաստատ բան չի կարելի ասել, որի մասին վկայութիւնները, դօկումէնտները թաղուած են Էջմիածնի և զանազան կոնսիստօրիանների արխիւ-

ներում: Ապագան կարող է լոյս ձգել այդ բոլորի վրայ և հրապարակ հանել ճշմարիտ իրականութիւնը... Սրբազանը բացի հայերէնից չը գիտէ ոչ մի լեզու կամ առարկայ: Նա շուտով կը լրանայ 80 տարեկան. ծնունդով քուրդ է:

Որովհետև կաթողիկոսական խնդիրը զարթնելու օրից հասարակական կարծիքը մեծ մասամբ կենտրոնացած է առաջին երեք անձինքների վերայ, ուստի այս եօթը անձնաւորութիւնների մասին ընդհանուր տեսութիւն անելուց յետոյ, նորից վերադառնում եմ այդ առաջին երեքին, այսինքն Խրիմեանին, Ներսէսին և Մուրադեանին:

Վերջերումս ռուսա-հայոց և տաճկա-հայոց մամուլների մէջ գրուող զանազան յօդուածները պաշտպանեցին զանազան անձինքների ընտրելիութիւնը: Այդ յօդուածներից շատերը մէկի արժանաւորութիւնը ցոյց տալու համար, անհրաժեշտ համարեցին միւսի արժանաւորութիւնը նսեմացնել: Այդպիսի յօդուածներից նշանաւորներն են պ. Մէլիքզադէ—Րաֆֆիի «Կաթողիկոսական հարցի առթիւ» վերնագրով մի շարք յօդուածներ, որոնք տպուեցան 1883 թ. «Մշակ»-ի №№ 194, 195, 196, 198, 201, 204: Չը նայելով, որ այդ յօդուածները միմեանց շարունակութիւն են կազմում, բայց դրանցից իւրաքանչիւրը ներկայացնում է կարծես առանձին և միւսին հակառակ ուղղու-

Թիւն: Օրինակ. յօդուածներից մէկը ցոյց է տալիս կաթուղիկոսական պաշտօնի բարձր նշանակութիւնը, միւսը իւր ուղղութեամբ կորցնում է նրա նշանակութիւնը. մի այլ յօդուած խնդրի մեծ նշանակութիւնը ցոյց տալով, քարոզում է մոռանալ ամեն անձնական կրքերը և պաշտպանել արժանաւորութիւնը, յաջորդ յօդուածը բացարձակ ստորացնում է յայտնի արժանաւորին և բարձրացնում է անարժաններին: Պարզեմ իմ միտքը. պ. Մէլիքզադէի յօդուածներից մէկը՝ «Մշակի» № 198 բացարձակ նսեմացնում է Մուրադեանին, իսկ ջատագովում է մի քանիսին, որոնց վրայ կը խօսեմ յետոյ: Եթէ պ. Մէլիքզադէն լինէր այն հրապարակախօսներից, որոնց շարունակ մեղադրում են անազնուլթեան և շահախնդրութեան մէջ, ես ուշադրութիւն չէի դարձնի այդ յօդուածների վերայ, բայց որովհետև պարոնը այն հրապարակախօսներիցն է, որոնք իրանց հակառակորդներին շարունակ մեղադրում են ստորութեան և կողմնապահութեան մէջ, ուստի թո՛ղ ներէ ինձ յարգելի վիպասանը, եթէ փոքր ինչ խստութեամբ վերաբերուեմ նրա յօդուածներին:

Պ. Մէլիքզադէն խօսելով կաթուղիկոսական ընտրելիների մասին, միակ արժանաւորներ այդ պաշտօնի համար յայտարարում է Խրիմեանին և Ներսէսին («Մշակ» № 196): Իրաւ է այդ երկու

անձինքներին ամենքս էլ յարգում ենք, բայց առաւելապէս պէտք է յարգել ազգային շահերը և կաթուղիկոսական պաշտօնը: *)

ԽՐԻՄԵԱՆԻ մասին խօսելով, ես վերևումն էլ ասեցի, որ իրաւ է սրբազանը շատ ազգասէր, լաւ քարոզիչ, տաղանդաւոր բանաստեղծ և յարգելի մարդ է, բայց կաթուղիկոս լինել չէ կարող, որովհետև բացի կառավարչական ընդունակութիւնից, նրան դեռ պակաս են այնպիսի շատ յատկութիւններ, որոնք անհրաժեշտ են այդմեծ պաշտօնը ստանձնողի համար: Վերևում տեսանք, որ Խրիմեանը դեռ Վ. Պօլսում պատրիարք եղած ժամանակ, ցոյց տուեց իր անընդունակութիւնը և սլառ ճառ դարձաւ մեծամեծ խռովութիւնների: Դեռ շատերը կը լիշեն, որ 1883 թ. Խրիմեանը իւր ծայրահեղ միամտութեան և անհեռատեսութեան շնորհիւ, առանց բովանդակութիւնը գիտենալու, Վանում ստորագրեց մի ինչ որ թուղթ, իսկ յետոյ բանի էութիւնը հասկանալով, սկսեց* բողոքել թէ իրան խաբել են: Այդպիսի անհաշիւ ստո-

*) Թէև «Հայաստանի սովը և Էջմիածինը» գրքոյկիս 42 երեսում ես գովարանել եմ Ներսէսին և Խրիմեանին, բայց ուրիշ հարց է նրանց հուշակը և ուրիշ հարց է կառավարչական ընդունակութիւնը, կաթուղիկոսական պաշտօնի համար: Ես դարձեալ կը յարգեմ նրանց իբրև արժանաւոր հոգևորականներ, բայց ոչ իբրև կաթուղիկոսացուներ:

բազրութիւններով կաթուղիկոսը շատ մեծամեծ և
անդառնալի վնասների պատճառ կարող է դառ-
նալ...

Խրիմեանը իւր յատկութիւններով ներկայա-
նում է աւելի մի անձնուրաց կրօնաւոր, քան թէ
մի բարձրաստիճան հոգևորական: Նրա կենցա-
ղավարութեան եղանակից պատմվում են շատ անէկ-
զօտներ, որոնք յիշեցնում են հինաւուրց աշ-
խարհատեացներին: Դեռ Կ. Պօլսի պատրիարք ե-
ղած ժամանակ պատահել է, որ նա իր բոլոր ու-
նեցած փողը, առանց մտածելու տուել է հանդի-
պած չքաւորին, իսկ ինքը, պաշտօնական անձանց
մօտ դնալու ժամանակ, փող չունենալու պատճառով,
մի քանի վերստ տարածութիւն անցել է ոտքով, իսկ
երբեմն էլ կառքին վճարելու վարձը պահանջել
է հանդիպած մարդուց: Պատմում են, թէ նրա
պատրիարքութեան ժամանակ, Հայաստանի կողմե-
րից մէկ աղքատ հայ քահանայ դիմում է Կ. Պօ-
լիս և Խրիմեանից օգնութիւն է խնդրում: Սրբա-
զանը փող չունենալու պատճառով, իր միակ նոր
Ֆարաջան տալիս է քահանային, իսկ ինքը երկար
ժամանակ մնում է հին, մաշուած Ֆարաջայի
մէջ: Կեանքի պարզութիւնը և բարեգործութիւնը
շատ լաւ բաներ են, բայց այսքան ծայրահեղու-
թիւնով իր ազգի և պաշտօնի պատիւը օտարնե-
րի առաջ ստորացնելը, անխոհեմութիւն է: Իմ

խօսքերը աւելի ապացուցանելու համար, այստեղ առաջ եմ բերում Խրիմեանի կաթողիկոսացութեան այժմեան պաշտպան պ. Մէլիքզադէի, սրբազանի մասին, նախկին գրուածքից հետեւեալ կտորները:

«Խրիմեանը իւր կեանքում շատ անգամ մեծ գումարներ ձեռքը ձգեց, բայց նա մնաց միշտ աղքատ, միշտ պարտքերի տակ խրուած: Խրիմեանը խիստ անփոյթ էր դէպի իւր անձնական վայելչութիւնը, դէպի իւր բարեկեցութիւնը, նա իւր վերայ ոչինչ չէր վատնում, իսկ բնաւորութեամբ, եթէ կարելի է այդպէս կոչել կօմուռնիստ էր: Նա որպէս անհաշիւ կերպով ստանում էր, նոյնպէս անհաշիւ կերպով սպառում էր: Հանդիպած աղքատին Խրիմեանը պատրաստ էր իւր վերջին փարան տալ և ինքը սոված մնալ: Սեպհականութիւնը նրա համար ոչինչ նշանակութիւն չունէր, երբ նա ծառայում էր ընդհանուրի օգտին:—

«Խրիմեանը չէր ծնուած բարձր կոչման համար, որ պատրիարքական աթոռի վերայ փթեցնէր իւր կեանքը, և ձեռքը, որ սովոր էր մուզանների շնորհած քնարը հնչեցնել, պարապեցնէր քաղաքական և կրօնական ժողովների վճիռները ստորագրելով:

«Խրիմեանը հոգևով բանաստեղծ է, իսկ սրբտով առաքեալ: Նա յիշեցնում է մեզ հինգերորդ դարու անձնուրաց արեղաներին, որք հոգևոր զինուորութեան ցուպը ձեռքներին կրած, հուրի և

սուրի միջից անցնելով պտտում էին Հայաստանում, ուսում, գիտութիւն և կրօնք էին տարածում:—

«Խրիմեանի պատրիարքութեան չորս տարին անցաւ խիստ անգոյն կերպով. նա մի երևելի բան չարդիւնաբերեց, որովհետև նա կառավարչական մարդ չէր: Այլ խօսքով, նա ուսած չէր դիպլոմատիկական խորամանկ ձևերը, որով հմուտ քաղաքագէտը պտտեցնում է իւր նենգաւոր մեքենան:

«Արդարև, Խրիմեանը եռանդոտ, անհանգիստ և անվաստակելի բնաւորութիւններից մինն է: Նա սիրում է գործել, ընկնել, կանգնել և միշտ պատերազմել վտանգների մրրկածուփ խռովութեան հետ: Բայց այդ բոլորը բաւական չէր մի սահմանադրական վարչութեան գլուխ լինելոյ համար: Խրիմեանը՝ որպէս շատ բանաստեղծներ՝ ի դէպ լիստ է: Նա համբերութիւն չունէր ազգային դործերի կանոնաւոր կերպով և յաջորդաբար բարեկարգուելուն: Նա պահանջում էր հրաշքներ: Նա կամենում էր Հայոց դեռ նոր տգիտութեան թմրութենից աչքը բացած ժողովուրդը յանկարծ վերաստեղծել և Շվէյցարիայի նման ձևակերպել: Խրիմեանը անհամբեր էր: Այդ պատճառաւ մենք տեսնում ենք նորա բոլոր ձեռնարկութիւնները, բոլոր հիմնարկութիւնները՝ այնքան երերուն և անտևողական են, որ օգային մետէօրայների նման յանկարծ ցոլանում են և շուտով անյայտանում

խաւարի մէջ: Նա ամեն բան սկսում է, ամեն բան ուզում է անել, բայց խիստ սակաւ է յաջողվում նրան:—

«Գնահատելի բարեկամ, ճակատագիրը կոչում է քեզ. պատրիարքութեան սահմանափակ-պաշտօնական շրջանը քո տեղը չէ: Գնա, որպէս Խորայէլը Բաբելոնում, միշտ կարօտում էիր քո նազելի Սալիմին— դա Վասսուրականն է: Գնահատելի, կրկին սիրէ Վարագը, սիրէ Ալգեստանի ուռիները, Արծիւը և ծառանգաւորաց դպրոցը քեզ սպասում են....» (Մշակ»-ի № 49, 1873 թ.)

Ահա այսպիսի գոյներով է նկարագրել պ. Մէլիքզադէն սրբազան Խրիմեանին, իսկ այժմ վերկենալ և պաշտպանել նորա ընտրելիութիւնը կաթողիկոսական ծանր պաշտօնի համար, դա պատիւ չէ բերում մի յայտնի հրապարակախօսին, որը շարունակ քարոզում է ազնուութիւն:

ՆԵՐՍԷՍԻ մասին խօսելով, ես վերևումն էլ ասեցի, որ սրբազանը գուցէ աւելի գործ կարող է կատարել Կ. Պօլսում պատրիարքական պաշտօնով, քան թէ էջմիածնում կաթողիկոսական պաշտօնով: Շատերը հաւատացնում են, որ պատրիարքութիւնը աւելի ծանր պաշտօն է, քան թէ կաթողիկոսութիւնը, բայց ես կասեմ ընդհակառակը: Լաւ պատրիարքութիւն անողը կարող է դժուարանալ կաթողիկոսութեան մէջ: Կ. Պօլսում կալ

քաղաքական ժողով, կայ կրօնական ժողով, կայ տնտեսական ժողով, վերջապէս կայ և Մզգային ժողով, որոնցից իւրաքանչիւրն էլ զբաղուած է իր մասնագիտութեան վերաբերեալ գործերի կառավարութիւնով, իսկ պատրիարքը ո՛չ այլ ինչ է, եթէ ո՛չ այսպէս ասած, այդ ժողովների վճիռները ստորագրող: Ես չեմ ուրանում, որ պատրիարքը ունի այդ ժողովներին նախագահելու, ուղղութիւն տալու և այլ շատ իրաւունքներ, բայց և այնպէս նրա իրաւունքները աւելի սահմանափակ են, քան թէ կաթողիկոսինը: Հասկանալի է, որ պատրիարքից այնքան մեծ ընդունակութիւն և հմտութիւններ չեն պահանջվում, որքան կաթողիկոսից, որի անձնական ընդունակութիւնից և բազմատեսակ հմտութիւններիցն է կախուած գործերի բոլոր տեսակների կառավարութիւնը:

ՄԱԻՐԱԿԵՍՆԻ մասին խօսելով, ես վերեւումս էլ ասեցի, որ սրբազանը կաթողիկոսական պաշտօնի համար շատ արժանաւորութիւններ է պարունակում իր մէջ: Իսկ այժմ համարձակ կարող եմ ասել, որ նրան կարելի է համարել մեր հոգևորականութեան մէջ երևացող այն հազուագիւտ անձինքներից մէկին, որի մէջ միանգամից շաղկապուած գտնվում են շատ տեսակ արժանաւորութիւններ: Կաթողիկոսական եօթը ընտրելիների մէջ Մուրադեանը միակ մարդն է, որ ունի

Աստուածաբանութեան դօկտօրի աստիճան, որ գիտէ
էջմիածնին տիրող պետութեան պաշտօնական—
ուսաց լեզուն, որ գիտէ և կլասիքական լեզուներ
և այլն... Բացի այս բոլորից, նա ունի և մի մեծ
սուաւելութիւն. նա ծնուել, սնուել, զարգացել
և գործել է ուսսահայերում, ճանապարհորդել է,
գործել է և ուսում է առել տաճկահայերում և
Եւրոպայի հայերում, իսկ այժմ առաջնորդ է դար-
ձեալ տաճկահայերում: Հայ ազգի այդ ցրուած
բոլոր մասերին նա ուսումնասիրել է և լաւ ծա-
նօթ է նրանց տեղական կեանքի, սովորութիւն-
ների և կարիքների հետ... Նա երկար ժամանակնե-
րով ապրել է այդ ցրուած ժողովրդի մէջ... Մու-
րադեանը դեռ ևս մեծ յարգանքով լիշվում է Թիֆ-
լիզում. մանաւանդ ինտելիգենտներից շատերը
մեծ համակրութեամբ են վերաբերվում դէպի նա:
Կաթողիկոսական ընտրելիութեան մասին խօսելով,
ես կասեմ, որ Ներսէսից կամ Մուրադեանից որին
էլ որ ընտրենք, մենք կ'ունենանք լաւ կաթու-
ղիկոս, բայց և համարձակ կարող եմ ասել, որ
այդ ծանր պաշտօնի համար աւելի գերադասելի
է Մուրադեանը: Այս ճշմարտութիւնը բացարձակ
վկայել է ինքը՝ սրբազան Ներսէս պատրիարքը:
Այս կարծիքի են և ուրիշ շատերը, որոնք ճանա-
չում են սրբազանին, թէ ուսսահայերից և թէ

տաճկա-հայերից, առսոնձնապէս ինտելիգենցիային պատկանողները:

Մէլիքզադէն խօսելով Մուրադեանի մասին, ասում է, որ ընդհանուր հայոց կաթուղիկոսի աթուրից դեռ շատ հեռու է կանգնած նա («Մշակ», № 198): Եթէ այս միաքը յայտնէր մի այնպիսի մարդ, որը մեր գրականութեան մէջ մի այնպիսի անձն լինէր, ես կը լռէի, բայց որ այդ անողը Մէլիքզադէ-Ռաֆֆին է, որը իրան ձեացնում է քաջ ծանօթ մեր հոգևորականների գործունէութեան և «քունջ ու պուճախի» հետ, և երբ դա այդպիսի անվայել կերպով անպատվում է արժանաւորութիւնը և ճշմարտութիւնը, դա շատ պախարակելի և ամեն կրիտիկայից ստոր վարմունք է... Ի՞նչն է ստիպել բանաստեղծ—հրապարակախօսին այդ յանցանքը գործելու, —ահա մի հետաքրքիր հարց... Նա իր գրուածքի մէջ ո՛չ մի հաստատ փաստ, ո՛չ մի ապացոյց առաջ չի բերում իր գրածները ապացուցանելու: Մուրադեանին կաթուղիկոսական ընտրելիութիւնից հեռու քշելու նպատակով, նա առաջ է բերում այս ծիծաղելի փաստը, թէ կաթուղիկոս ընտրուողը անպատճառ պէտք է Կ. Պօլսի պատրիարք եղած լինի և թէ չէ կարելի հասարակ թեմական առաջնորդներից կաթուղիկոս ընտրել: Չը գիտեմ իմ ասածը որքան ուղիղ կը լինի, բայց պ. Մէլիքզադէն, իբրև ան-

ցեալը լաւ ուսումնասիրող աւելի լաւ պէտք է գիտենայ, որ մեր եկեղեցական պատմութեան մէջ պատահել են դէպքեր, որ կաթուղիկոս ընտրուել է ո՛չ միայն հասարակ թեմական առաջնորդներից և վանահայրերից, այլ և ուղղակի աշխարհականներից: Ես կը յիշեմ միայն Ներսէս-Մեծին, որը զինուորականութեան մէջ կրթուած և հայոց Արշակ թագաւորի մօտ զինակրի պաշտօն էր վարում, և այդ մարդը այն պայծառ և լուսաւոր աստղներից մէկը դարձաւ, որոնք շատ քիչ անգամ են ցոլացել մեր եկեղեցական հորիզոնի վերայ: Յիշեմ աւելի նորը, Ներսէս Ե-ը թեմական առաջնորդ էր, իսկ Մատթէոսը և Գէորգը պատրիարքներ էին, թո՛ղ ընթերցողը դատէ, թէ սրանց մէջ ո՞րն աւելի արժանաւոր էր:

Մուրադեանին ստորացնողը չէ քաշվում և չէ խղճահարվում և իբրև նրանից բարձր և արժանաւորներ առաջ է բերում՝ Թիֆլիսի թեմի առաջնորդ Աբիստակէս եպիսկոպոսին, Աստրախանի թեմի առաջնորդ Սուքիաս եպիսկոպոսին, Երևանի թեմի առաջնորդ Սուրէնեան Գէորգ եպիսկոպոսին, Սինոդի անդամ և գանձապահ Ներսէս եպիսկոպոսին: Աբիստակէս սրբազանը դեռ նոր եպիսկոպոս է, դուցէ բարի և առաջադէմ ձգտումներով և անտարակոյս բարձր է միւս մի քանի անարժան և անդործունեայ հողեօրականներից, բայց նա դեռ ևս մի

այնպիսի զգալի արդիւնք և բնդունակութիւն չէ
ցոյց տուել, որ նրան կարելի լինէր համեմատել
մեր լաւ հոգևորականների հետ: Մի որ և է շի-
նութեան պատուհանների և սանդուղքների նորո-
գելը արժանաւորութիւն չէ համարվում: Գեո.
պէտք է գործել... Սուրէնեան Գէորգ եպիսկոպոսը
դեռ ևս չէ ցոյց տուել ո՛չ մի տեսակ արժանա-
ւորութիւն, բացի այն, որ նա Սլէքսանդրօպօլում
յաջորդ եղած ժամանակ, արդելեց տեղական եկե-
ղեցիներում հոգեհանգիստ կատարել հանգու-
ցեալ գիտնական Ստեփաննոս Նազարեանցի լիշա-
տակին, քարոզելով ժողովրդին, թէ հանգուցեալը
հայերի մէջ բողոքականութիւն տարածող և Լու-
սաւորչական եկեղեցու քանդողն է: Ներսէս ե-
պիսկոպոսի միակ արժանաւորութիւնը նրա մէջն
է կայանում, որ նա երբեմն «Մանկունիւն ընկ.»
հռչակաւոր խմբի ամենապատուաւոր և գոր-
ծող անդամներից մէկն էր, իսկ այժմ նայն
Ներսէս սրբազանը իրան շատագոյն Մէլիքա-
զէ — Բաֆֆիի գործակալ — զրավաճառի պաշտօն
է վարում էջմիածնում: Իսլով Սուքիաս եպիս-
կոպոսին, ես կասեմ, որ թէև սրբազանը արժա-
նաւոր, ազնիւ և եռանդոտ եկեղեցական է և
վերը լիշուած երեք եպիսկոպոսներից բարձր է,
բայց և այնպէս, նրան դերագասել և մինչև անգամ
համեմատել Սուրաբեանի հետ, — անկարելի է: Եթէ

պ. Մէլիքզադէն անկեղծօրէն կամենում էր ազգին ծանօթացնել ռուսա-հայոց արժանաւոր հոգեւորականների հետ, նա առաջին տեղը պէտք է շնորհէր Աղափիրեան Գրիգոր եպիսկոպոսին և Խորէն Տ. վ. Ստեփանէին, որոնք լաւ յայտնի են ռուսահայերիս և մինչև անգամ տաճկահայերից շատերին, և գործողներ են մեր մանկավարժական և գրականական ասպարէզներում, բայց իհարկէ, սըրանց ևս չէ կարելի համեմատել Մուրադեանի հետ: Յաւալի է, որ մեռած անցեալի սիրահարները շատ քիչ ուշադրութիւն են դարձնում կենդանի ներկայի վրայ: Նրանք աւելի մեծ ոգեւորութեամբ են նկարագրում հարիւրաւոր տարիներից առաջ մահմետական հարեմների մէջ կատարուող սիրային յարաբերութիւնները, քան թէ ներկային հետաքրքրող և անհրաժեշտ կենսական հարցերը...

Ահա թէ ինչ կը նշանակէ մոլորեցնել հասարակական կարծիքը: Ով որ հաւատում է պ. Մէլիքզադէի գրուածքի անկեղծութեանը և չէ ճանաչում նրանից անարգուած Մուրադեանին և յարգուած եպիսկոպոսներին, իհարկէ պէտք է մի և նոյն տեսակ գաղափարը կազմի յիշեալ անձինքների վերաբերութեամբ: Անտարակոյս ես էլ նոյն վիճակին պիտի ենթարկուէի, եթէ ճանաչելիս չը լինէի այդ անձինքներին: Առանց այն էլ վերջերումս շատացել են մեր մէջ շահախնդիր և կեղծաւոր

մարդիք, որոնք դէպի չարն են գործածում թէ խմբագրի և թէ հասարակութեան դէպի իրանց ունեցած հաւատարմութիւնը և ամեն մի դատարկ բանի համար պատրաստ են լրագրի ամբողջ երեսները լցնել, թէ այս ինչ եպիսկոպոսը այս արաւ կամ այն արաւ, նորան հաճոյանալու նպատակով, և այդպիսով լրագրի պատիւը ստորացնում են հասարակութեան առաջ... Մէլիքզադէի մասին խօսքս փոքր ինչ երկարեց, որովհետեւ նրանից ոտնակոխ եղած ճշմարտութեան վերականգնումը այդպէս էր պահանջում: Թէ և սրբազան Մուրադեանը, իբրև մի յայտնի արժանաւոր մարդ, կարօտ չէ իմ թոյլ պաշտպանութեան, բայց և այնպէս իմ նպատակն էր ցրել այն անձանց կարծիքները, որոնք պ. Մէլիքզադէի շնորհիւ կազմուել են, թէ նրանից անարգուած Մուրադեանի և թէ ջատագոված եպիսկոպոսների վերաբերութեամբ: Պէտք է մեծ խնայողութեամբ վարուել դէպի այն անձանց պատիւը, որոնք իբրև յայտնի արժանաւորներ, շատ ուշ ուշ են երևում մեր մէջ: Թող ներէ ինձ յարգելի վիպասանը նկատել նորան, որ նա իւր այդ վարմունքով բաւական արատ բերեց թէ իրան և թէ «Մշակ»-ի անուան: Այդ առիթով մինչև անգամ ես ստացել եմ շատ նկատողութիւններ և նախատինքներ այն անձինքներից, որոնց առաջ ես միշտ ոգևորութեամբ

պաշտպանելիս եմ եղել թէ նորան և թէ «Մշակ»-ին: Բայց և այնպէս, ես այսուհետեւ էլ պարունին յարգելու եմ իբրև տաղանդաւոր վիպասանին, բայց ոչ իբրև ճշմարտասէր և անկողմնապահ հրապարակախօսին: Երանի թէ ես սխալուած լինէի...

Ես համառօտապէս իմ բարեկամական նկատողութիւնները արեցի պ. Մէլիքզադէին, որպէս զի նա այսուհետեւ մի որ և է հարց քննադատելիս ի նկատի ունենայ ընդհանուրի շահերը և ինչ բանի մէջ մեղադրում է ուրիշներին ինքը նոյնը չանի և այդպիսով աւելի արատ չը բերի իր տաղանդաւոր վիպասանական հռչակին: «Կայծերի» հերոս—Ս.սլանի ստեղծագործողին, որին յարգողներից մէկն եմ, վայել չէ հասարակական հարցի ժամանակ անձնականին վերաբերեալ համակրական կամ հակակրական զգայմունքներին տեղի տալ...

Վերջացնելով խօսքս, դիմում եմ Ձեզ սվ ժողովրդի ներկայացուցիչ պատգամաւորներ և Ձեր խորին ուշադրութիւնը հրաւիրում եմ կաթուղի-կոսական ընտրութեան ծանրակշիռ հարցի վերայ: Ժողովուրդը հաւատացել և յանձնել է Ձեզ այդ մեծ խնդրի վճիռը կայացնելու: Եթէ Դուք յարգում էք Հայաստանեայց Եկեղեցու և ժողովրդի իրական շահերը, եթէ անկեղծօրէն յանկալի է Ձեզ Ազգի և Եկեղեցու յառաջադիմութիւնը և պայծառութիւնը, ուրեմն մոռացէք դէպի

ամեն մի ընտրելին ամեն մի անձնական համակրութիւն կամ հակակրութիւն և ընտրեցէք կաթողիկոս այն մարդուն, որը ամենից արժանաւոր և յարմար է Հայ-Եկեղեցու և ժողովրդի ժամանակակից կարիքներին. իսկ թէ ո՞րն է այդ արժանաւոր մարդը, այդ Դուք ինքներդ կարող էք լրջմտութեամբ դատել և հասկանալ: Աշխատեցէք զգուշանալ: Եթէ դուք այնքան անհեռատես կը գտնուէք, որ Եկեղեցու և ժողովրդի շահերը նորից կը մատնէք իր նախնի թաց վնասներին, գիտացէք, որ Ձեր անուները երկար չեն կարող թագնուել խաւարի մէջ Մայր—Աթոռի ուրուականից: Ապագան ամենայն զգուշանքով և դառնագին անէծքներով կը մտաբերէ Ձեր յիշատակները և Ձեր անուները իրանց սև և ամօթալի գոյներով կ'արձանագրուեն պատմութեան արհամարհական բաժնում...

Տացէ Աստուած, որ Դուք արժանաւորապէս կատարէք Ձեր պարտականութիւնը և պաշտպանէք Ազգի և Եկեղեցու շահերը, որպէս զի Ծերունի Եջմիածնի Մայր-Աթոռի վերայ բարձրանայ մի լուսաւոր, հասկացող և արժանաւոր մարդ, որը կարողանայ օրինաւոր կերպով վարել իւր ստանձնած մեծ և ծանր պաշտօնը և ժամանակակից ոգւով կառավարել և խնամել իւր բազմակարիք ժողո-

վրդին, որի լառաջագիմուծիւնը և բարօրուծիւնը
ուրիշ շատ անկեղծ սրտերի հետ միասին, ի բո-
լոր սրտէ ցանկանում է

Ա. Ս.



